

四庫全書

史部

欽定四庫全書

禮部志稿卷五十七

明 俞汝楫 編

列傳

郎署

宋濂

宋濂字景濂浙江金華人幼聰敏強記從同郡吳萊黃潛學為古文有聲元至正間有薦濂翰林編修官者濂

以親老不就隱居小龍門山中歲辛丑金華既歸附上
遣使以書幣徵之與括蒼劉基葉琛章溢四人同見上
甚禮重之擢濂江西等處儒學提舉既而命授皇太子
經甲辰十月改起居注乙巳三月以疾告歸上賜以金
帛太子亦厚遺之濂歸奉表謝上賜書嘉勞之其畧曰
先生之師吾子訓飭甚嚴是不佞也以時言講解釋聖
賢之意是不固也以忠貞立心以節儉制行是得儒者
之道也昔聞古人今親見之仍侑以文綺洪武三年修

元史詔徵濂與翰林待制王禕為總裁官六月除翰林
學士亞中大夫知制誥兼修國史三年以失朝叅左遷
編修四年遷國子司業秋以議祭孔子禮稽緩貶知安
遠縣是年十一月召還為禮部主事五年冬遷太子贊善
大夫六年七月復命為翰林侍講學士中順大夫知制
誥同修國史仍兼贊善大夫八月上命濂與詹同樂韶
鳳等纂修大明日歷一百卷又與吳伯宗朱右等修寶
訓五卷每旦侍膳燕見必命茶賜坐濂不能飲一日侍

飲醉行不能成步上見而歡甚為詩賜之仍命侍臣咸為歌辭且曰使後世知吾君臣同樂如此也九年拜翰林學士承旨嘉議大夫知制誥兼修國史仍兼贊善大夫擢濂長孫慎為殿廷儀禮司序班復召濂仲子璲為中書舍人子孫聯班內廷儒者榮之濂既老難于步趨上命選良馬以賜復為作良馬歌命詞臣咸賦之以示優寵年六十八上憫其老賜致仕歸鄉里及陞辭上以御製文集賜之加鈔綵段及衣三襲命其孫慎護至家濂

上表稱謝上復賜手詔答之自是每歲一朝至則恩遇之甚厚十三年璲以事得罪濂當連坐有司請罪之上以濂舊臣特命居于茂州十四年五月行至夔州卒所著有潛溪集四十卷蘿山集五卷龍門子三卷浦陽人物記二卷翰苑集四十卷歸田集四十卷長子璣與璲俱以能書名

吳伯宗

吳伯宗撫州金谿人洪武四年進士第一時初開科取

士得伯宗上甚喜賜袍笏冠服擢禮部員外郎命與學士宋濂等同修日歷胡惟庸方用事欲人附已伯宗性剛直不肯與之相降屈惟庸每銜之八年竟坐忤庸庸中傷以事謫居鳳陽伯宗上書論時政因言惟庸專恣不法不宜獨任以事恐久為國患詞甚剴切上得其言即召還賜襲衣鈔錠奉使安南得馴象方物以歸除國子助教十二年命進講東宮首陳正心誠意之說皇太子嘉納之明年改為翰林典籍御製十題命賦之伯宗

援筆立就詞語峻潔上嘉其才敏賜織金錦衣十四年
除太常寺丞辭不拜十五年除國子司業復固辭由是
忤旨貶陝西金縣教諭至淮安召還除翰林檢討未幾
拜武英殿大學士十六年冬坐弟仲實為三河知縣薦
舉不以實伯宗為所累復降為翰林檢討十七年卒伯
宗為人溫厚詳雅博學能文章所著有南宮集使交集
成均玉堂等集

魏觀

魏觀字起山武昌蒲圻人初以文學薦為國子助教歷
浙東提刑按察司僉事吳元年遷兩淮都轉運鹽司入
為起居注三年正月陞太常卿七月轉翰林侍讀學士
十二月拜國子祭酒四年八月以考祭孔子禮不以時
奏貶為龍南知縣甫至官召還為禮部主事五年三月
出知蘇州府深懲陳寧苛酷之弊一以寬厚為政明教
化正風俗郡中翕然陞四川叅政未行上以蘇州大郡
政務繁劇非其人不可使理命仍知蘇州焉

陳敬

陳敬者世家增城之石灘洪武十四年以賢良舉授禮部主客司郎中遇事剛果敢為人多忌之以事左遷雲南曲靖府幕官尋署劍州州事劍州鄉寇竊發來攻州城敬不欲為偷生計親率壯士禦之衆寡不敵其下欲退敬瞋目大罵賈勇前進遂力戰而死軍民咸聚哭賻焉上聞命有司恤其喪

王鈍

王鈞河南太康人洪武中舉秀才授禮部主事改湖廣長沙府通判坐事免復舉明經授北平府通判入為吏部試郎中陞福建布政司左叅議陞本司左叅政奉使熨夷熨夷致贈遺固辭不得強受之至雲南悉納布政司官庫太祖高皇帝嘉之陞浙江布政使建文中陞戶部尚書成祖即位命解戶部之務月給尚書俸之半居京師後命往北京山東撫綏軍民經理屯戍永樂三年以老賜敕獎諭命仍以浙江左布政使司之職致仕還鄉

鈍有文學持身廉靜然為人脂韋遇大議媿媿無所可
否云

崔恂

崔恂青州臨淄人洪武間由鄉貢舉人擢禮部主客員
外郎陞兵部車駕郎中永樂二年陞雲南左叅政恂資
質厚重以謙謹自持事其母孝居官雖遠地必迎就養
及卒人多惜之

林鴻

林鴻字子羽福清人少任俠不羈讀書能強記高皇帝時部使者以人才薦授將樂儒學訓導居七年擢拜膳部員外郎高皇帝臨軒試龍池春曉孤鴈二詩一日名動京師是時鴻年未四十高皇帝治尚操切而鴻性脫落不善仕又久為散秩無自表見遂自免歸歸益閉門謝客肆力為詩其後閩人言詩者皆本鴻云

尹昌隆

尹昌隆江西人洪武中舉進士授修撰改監察御史建

文初視朝頗晏昌隆疏諫制以昌隆所言切中朕過禮部可徧行天下使朕有過人得而知之及文皇帝舉兵南向昌隆上書言今事勢日去而北來章奏有周公輔成王之語不若罷兵息戰許其入朝彼既欲伸大義於天下不應便相違戾設有蹉跌便須舉位讓之猶不失作藩王也不報文皇帝入南京指為奸黨驅出戮之昌隆當陞大呼曰臣當時曾上章勸以位讓陛下奏牘尚在可覆按也上乃命緩昌隆刑閱其奏上流涕詔特貸

昌隆死且諭之曰朕長子在北京爾往事之爾能盡誠
輔導朕不忘爾昌隆頓首謝永樂二年冊立皇太子授
昌隆左春坊中允前后在東宮隨事匡諫多所補益太
子甚重之後陞禮部主事尚書呂震方承寵用事羣臣
無比昌隆適有事請不得以舊事東宮遽啓令旨行之
震大怒奏昌隆傲慢狼愎事多專行無屬官禮且身為
王官事須上奏而乃假托宮僚怙賴恩私陰欲樹結潛
蓄無君之心又言昌隆身事庶人名在黨籍僥倖苟免

見利忘義其心叵測其行匪良不宜任用上乃命逮昌隆下獄尋遇赦復官丁父憂歸後起復至京往謁震震溫言接之入理前奏詔繫昌隆錦衣衛獄且籍其家後數年谷王謀反事發詞連昌隆以曾經保奏為長史乃坐以同謀詔公卿雜問昌隆初不服震折之昌隆知不可免乃無言獄具上劄死夷其族

宋琰

宋琰字廷圭浙江奉化縣人永樂乙未進士授翰林庶

吉士與修性理大全改中書舍人宣德初陞行在禮部
主事預修宣宗實錄轉吏部考功入內府授內使書太
監王振重之正統中陞河南右叅政景泰四年入為太
僕寺卿遷兵部右侍郎上初復位改南京兵部卒賜葬
祭琰為人敦雅好學旁通風鑑星命諸術

洪英

洪英字實夫福建懷安縣人永樂乙未會試第一登進
士入翰林為庶吉士擢禮部主客司主事歷吏部文選

考功主事兩為會試同考官進考功郎中陞山東左布政使正統乙巳邊寇犯順陞都察院左副都御史巡撫山東督役夫臨清築運河堤景泰壬申進右都御史巡撫浙江會有旨考察百官賢否以行黜陟英惑於左右之言去取有未當者因懇乞致仕歸英為人端疑詳雅在官無赫赫之譽而亦不失為善人長者云

曹義

曹義字子宜應天府句容縣人永樂中以舉人選入翰

林譯夷字舉進士為翰林庶吉士十六年授編修轉禮部儀制司主事仍於翰林供事宣德十年陞吏部文選司員外郎正統九年秩滿陞本司郎中尋陞本部右侍郎十四年北兵犯邊京師戒嚴義與中貴守朝陽東直二門又奉命獨守崇文門景泰改元陞南京兵部尚書天順元年上復位奉表來賀命致仕賜以璽書卒年七十六訃聞遣官諭祭命有司營葬義為人平易不檢時薦舉方面得以高下其說人多餽遺之亦善營利在吏

部家人猶多為賈典選幾二十年無清譽第篤於友道而不遺故舊云

吳政

吳政浙江麗水縣人由進士擢禮部主事尋陞員外郎以幹濟稱宣德中陞本部右侍郎巡撫湖廣鋤強扶弱民用以寧正統中轉南京工部左侍郎未幾致仕至是卒遣官諭祭命有司治喪葬

孫原貞

孫原貞本名瑀以字行江西德興縣人舉永樂乙未進士授禮部主事遷郎中正統中陞河南叅政進浙江右布政使時閩浙羣盜雖更赦罷兵尚未帖服原貞度其必反圖上方畧請為備禦未幾賊果叛發兵征討命叅議軍事乃督兵深入擒其賊首捷聞陞兵部左侍郎叅贊軍務鎮浙江進尚書奉命考福建吏治遂留鎮焉復與都御史劉廣衡平浙江賊五年仍鎮浙江天順初以老命致仕上即位詔進階一級卒年八十七訃聞遣官

祭葬如例原貞居官以清慎自將多著勞效令終壽考亦世所難得云

丁鎡

丁鎡字永時直隸南陵縣人由楷書生員預修永樂大典永樂十七年授行在戶部主事繼調吏部文選司復調禮部祠祭司二十一年扈駕北征洪熙元年陞本司員外郎宣德四年丁父憂服闋調戶部正統初陞浙江鹽運使以廉能稱九年述職來京上嘉鎡治行超卓宴

賞厚甚仍命吏部紀名以待陞用十四年陞河南布政使景泰元年召還陞刑部左侍郎已而為御史所劾令致仕遣官諭祭命有司為營葬事

陳士啓

陳士啓字震之江西泰和人由進士觀政右軍都督府時成國公朱能掌府事得士啓喜甚間暇輒從講論古大臣賢將所以事君使人之道能禮遇加厚召入翰林為庶吉士修永樂大典書成擢禮部祠祭司郎中直道

自任不為苟免薦陞山東布政司右叅政青州歲歉郡
具饑民數上聞朝廷遣使偕士啓如數賑之粟比至而
饑民倍增使者議再奏俟報士啓曰民命在旦夕若再
俟報浹旬間悉餒死矣請發奏後即出粟脫有罪請自
任不敢以累使者遂獨具奏朝廷從之所至民有爭訟
羣邑未決而伏馬首以訴者從容數語諭之皆帖服其
為政廉平無所矯拂所至其民愛之

李昌祺

李昌祺名貞江西廬陵縣人少穎異以進士選翰林庶吉士預修永樂大典號稱博洽書成擢禮部主客司郎中廉慎効職宣德薦陞廣西左布政使以德化人谿洞諸蠻聞聲歛跡不復為患未幾以詿誤謫役房山已而宥還改河南左布政使亦有惠政及民尋丁內艱詔特起之正統中疏乞致仕從之景泰三年卒家事蕭然幾不能斂其詩敏贍流麗時輩稱之

劉球

劉球字廷振江西安福人自幼舉動不凡長老目為國器永樂辛丑進士擢禮部儀制司主事正統初充經筵官預修宣宗實錄成改侍講正統間上疏言十事疏入命五府六部都察院集議咸言球所言惟擇太常寺官當從之請令吏部推舉翰林修撰董璘聞之遽自乞為太常寺官球坐璘累執下錦衣衛獄數日錦衣衛指揮馬順承中官王振意以球病死聞碎其屍棄之士論惜焉正統乙巳贈翰林學士謚忠愍

李數

李數字居學順天府涿州人永樂初詔開北京國子監數以郡庠生被選時仁宗以皇太子居守北京發策以奉聖德安民生為問數以敏對擢居第一賜衣一襲鈔四十錠命為監生首久之授京衛經歷陞禮部主事屢扈駕巡幸及北征十五年遷祠祭司員外郎奉使陝西還奏關中旱甚詔如所言賑之又明年陞江西左叅議尋改四川洪熙初入朝奏除四川歲買茶課宣德五年奏

請松潘邊餉宜從近地轉輸以便民得許著為令秩滿
遷右叅政正統初陞右布政使疏言軍食鹽待民運不
便宜從軍自請給從之及奏罷歲造水戰鞍等軍器丁
母憂家居又奏成都各處抽分物貨局及鹽井歲久淡
竭宜定減課額皆從之奪情復任六年以大臣舉選吏
部左侍郎尋卒命有司諭祭為治墳墓數剛直勤慎在
蜀十餘年不以家隨政績著聞蜀人稱之及居吏部人
望有不足云

鄒濟

鄒濟字汝舟餘杭人初為縣學訓導累官平度州知州
預修太祖高皇帝實錄陞禮部儀制郎中從總兵官英
國公孫輔征安南掌奏記還陞廣東布政使司右叅政
坐事左遷吏部郎中尋擢左春坊左庶子秩滿陞詹事
府少詹事未幾卒於官為人和易不見崖岸於物無忤
兼通老釋之學善伺上意寵遇特厚洪熙元年上追念
之贈太子少保諡文敏命有司立祠墓側歲以春秋祭焉

葛清隱

葛清隱江西廬陵人自樂舞生擢為山川壇奉祀陞太常寺清慎端厚熟於典禮秉誠持敬以奉神明仁宗皇帝為皇太子監國每歲代祀天地宗廟山川清隱相禮深見嘉重後坐畧改禮部主事永樂十九年以老致仕仁宗皇帝嗣位特敕召之迨至上矜其老不欲煩以政仍令致仕

葉春

葉春浙江海鹽縣人初為禮部主客司主事陞郎中再陞兩淮鹽運使改福建布政司右叅政宣德三年調四川未赴任奏浙江土豪為民患郡縣不能制上命大理寺卿熊概錦衣衛指揮任啓及春巡撫蘇常及浙江諸郡察捕強豪以安善良春雖行事于其鄉能持公道既還陞刑部右侍郎居無幾遘疾卒訃聞賜祭命有司治葬

况鍾

况鍾字伯律江西靖安縣人由學吏從事禮部尚書呂
震保授儀制司主事尋陞郎中尚書胡濙薦陞蘇州府
知府賜璽書以往郡多宿弊鍾剔除之首黜貪污數人
凡政令便于民者靡不興復未幾以憂去民歌之曰况
太守民父母願復來養田叟七邑耆民赴闕保留詔從
之奏蠲重額糧七十萬餘石開豁枉為軍者八千百餘
戶為教條以教民立善惡簿以季考月書久而不悛者
罪之秩滿軍民耆老萬餘人仍保留詔進三品祿正統

七年卒鍾有治劇才故郡事雖殷理之綽有餘裕當時
論者以為能吏云

禮部志稿卷五十七

欽定四庫全書

禮部志稿卷五十八

明 俞汝楫 編

列傳

郎署

滕員

滕員字尚默建之甌寧人幼以開敏聞於鄉年十一補郡庠弟子員未幾領鄉薦卒業太學聲譽焯焯日起同

舍生咸心服之正統己未吏部考選居優等得廣之韶
州府同知一時同選者咸謂君才與官宜無異言者之
任值歲歉公私無積貯守以下無藉手地員至傾囊得
白金若干兩告糴鄰郡命里耆籍民之窘甚者朝夕給
之全活數千人郡治舊為淮王府王遷國之饒得請復
為郡其規制奢大非人臣所宜居又吏胥公退無所於
處徃徃雜就民居員截長縮大削雕還樸復為郡治如
常式又度地為吏舍限其出入絕吏民交搆之弊自昔

郡吏惟取充數鮮有通文墨者動輒假手他人員痛革之凡上下文移具為成式以示吏俾其如式草創而為之潤色焉受其指畫後為通習所郡地界江閩湖三藩之衝主戶少而客戶多少拂其意輒相扇弗靖而翁源乳源二邑尤甚員躬巡行省揭榜開諭許其占籍遂與編戶無異凡郡之政員方一一興革之以丁內艱解任吏民不忍員去至有垂涕者比聞員服闋當之京耆老數百人詣闕乞再任之朝議已除代者不允員適至遂

有祠部之除清白之操賢能之聲著聞遠近在郎署踰
三年為正統己巳扈駕北狩歿于王事明年蒙恩褒卹
進其階為奉政大夫

孫洪

孫洪字伯大山東昌邑縣人景泰五年進士授兵部主
事遷郎中丁憂服闋改禮部郎中成化間歷陞河南右
叅政左右布政使遷右副都御史巡撫大同以威寧海
子之捷進左副都御史食正二品俸進右都御史巡撫

河南後為周府儀賓劉宣所奏下獄尋命致仕洪有幹局為叅政時以贊畫撫治流民有勞巡撫河南奏停王府造作蠲逋負浚滏河以興水利人頗稱之其為儀賓所奏亦王府怨之而致是云

杜謙

杜謙字益之直隸昌黎人景泰五年進士授工部主事管理呂梁洪三年考滿改禮部主事陞員外郎中用尚書姚夔薦擢浙江右叅政歷左右布政司召為順天府

尹尋陞工部侍郎成化二十三年為言者所劾因陳乞致仕許之後以詔書恩進階資善大夫卒賜祭葬如例謙少有孝行居浙江時人稱為重厚長者子源亦第進士官至青州知州

高敞

高敞字德廣直隸崑山縣人成化八年進士授禮部主事歷陞員外郎郎中順天府丞以父憂服闋改應天府進府尹在禮部時數奉使於外歲無寧居畿內饑嘗上

疏請發內帑銀五萬兩賑濟所活甚衆及為府尹政頗
尚平易然亦無大治績云

于冕

于冕字景瞻浙江錢塘縣人少保兵部尚書謙之子景
泰元年以謙功廕授世襲副千戶謙死冕亦從坐謫戍
龍門屢上書訟其父寃憲宗登極謙寃昭雪並復冕官
冕自陳不願武職改兵部員外郎累陞禮部郎中南京
太僕寺少卿應天府府尹致仕卒於家賜祭葬如例冕

雖不由科目然頗涉書史有幹局歷官能舉其職不愧其父云

王沂

王沂字希曾直隸武進縣人南京吏部尚書與之子成化十一年進士授禮部主事歷陞員外郎郎中山東右叅政湖廣右叅政丁父憂服闋轉山東左布政使弘治十四年陞右副都御史巡撫真定等府兼提督紫荆三關累疏乞休不允卒于官年六十二訃聞賜祭葬給驛

歸其喪沂嚴毅謹恪天性孝友在禮部時外國以獅子來貢希重賞又有貢刀劍數至三萬者沂言夷人貪詐無厭量損其賜直且定數註為例憲朝上賓凡山陵廟祧遷祔之議儀文草創多所考據及巡撫時賦役繁重力為裁省濔沱河水溢壞民田廬奏請築堤捍之功成賜綺幣獎勞自處儉約家雖富無貴侈態居官二十餘年終始一致人以為有父風云

陳鎬

陳鎬字宗之其先會稽人占籍南京欽天監成化丙午
舉應天鄉試第一明年舉進士授禮部主事改南京吏
部歷陞員外郎中山東按察副使提督學校轉江西叅
政尋陞湖廣右布政使平漢沔劇盜有功庚午進都察
院右副都御史巡撫湖廣明年以病乞歸命未下而卒
鎬明敏有吏幹董學時較閱精當得士心巡撫時漢沔
之盜黨未平建議散其衆歸農衆賴以安鎬與弟欽同
科進士而皆有才名欽亦為廣東提學副使

蔡清

蔡清字介夫泉州府晉江縣人福建鄉試第一成化甲辰進士授祠祭主事改稽勲尋署驗封員外郎以父憂歸服闋除主客轉南京文選郎中乞終養歸遂丁母憂服闋即其家拜江西按察司副使提調學校屢辭始就職旋復乞致仕去未幾擢祭酒命未至而卒清天資沉潛深探理學所養純粹內外一致在江西務端士習正文體嘗曰學宜養正性持正行聖賢言語熟復玩味則

舊去新來日改月化天性孝友內外親族貧無衣食者及不能葬者皆收恤之家屢空勿計也體雖孱脆而好學不倦其學術德器為一時名儒蓋於模範甚稱惜享年不永莫究其用云

王綸

王綸浙江慈谿人成化甲辰進士初除工部都水司主事以內艱去改禮部儀制司歷員外郎郎中弘治庚申陞廣東叅政尋轉布政正德己巳由廣西布政陞都察

院右副都御史巡撫湖廣兼理軍務未幾遭外艱值郴永盜賊猖獗特詔奪情督軍閱三月賊平始許終制遂以疾卒與祭一壇綸以能醫游公卿間公卿多喜之者而才能亦足集事故卒至臺省大官其氣岸簡伉酬應頗刻覈且有凌忽之態自敵已以下多惡之

呂憲

呂憲字秉之翰林學士贈禮部左侍郎謚文懿原之子也以廕錄為國子生成化初又以東宮恩授中書舍人

仍上疏乞應試遂薦京闈中書舍人之得應試也實自
呂憲始秩滿遷禮部員外郎郎中擢南京太僕少卿改
通政丙辰擢太常寺卿正德丁卯始致仕閱四年卒詔
祭葬如制憲為人坦易喜讀書作詩文習典故文與行
能世其家

徐說

徐說字以中直隸宣城縣人成化戊戌進士授禮部祠
祭司主事轉員外郎郎中陞南京右通政弘治十五年

致仕至是卒賜祭如例說性遲重居官勤政務然遇事多渙忍依違寡方正之操人不能無訾議云

王雲鳳

王雲鳳字應韶山西和順縣人成化甲辰進士授禮部主客司主事遷祠祭司員外郎郎中副使楊茂元言事獲罪上疏救之又奏太監李廣專恣不法乞正典刑會郊祀雲鳳騎而入壇遂得罪謫陝州知州廣敗乃陞陝西提學副使條約甚嚴再陞山東按察司使亦以嚴明

稱母喪去官逆瑾羅織罰米千餘石家遂懸磬張綵為吏部時言于瑾擢雲鳳國子祭酒司務孫璉者瑾女弟之夫也亦怙瑾勢雲鳳嘗與往還璉後為瑾所疎以病免歸雲鳳不知也復郊餞之瑾語人曰孫璉何人也士大夫至往餞之雲鳳祭酒亦可爾耶遂改南京通政尋謝病歸復起為右僉都御史巡撫宣府在任僅兩踰月凡上數十疏如建儲及充調邊軍皆及之會父喪去官至是卒鳳好奇立異銳於取名然中實靡定為節不終

人多薄之

姚鏌

姚鏌浙江慈谿縣人弘治乙丑進士授禮部主事累陞
都察院右副都御史巡撫延綏工部右侍郎督易州山
厰右都御史提督兩廣軍務以勦平叛夷岑猛功陞左
都御史太子少保未幾猛部盧蘇等復亂官兵討之不
克御史石金劾鏌失策遺患遂落職致仕久之以薦起
兵部尚書兼左都御史總制陝西三邊未任乞休報允

尋卒賜祭葬如例。鎮端嚴博大，任職以公。廉見稱。

邵銳

邵銳，浙江仁和人。由正德三年進士，改庶吉士，授翰林院編修。調寧國府推官。陞南京吏部主事、禮部員外郎。江西提學僉事。福建提學副使。湖廣右叅政。河南按察司。廣東山東左右布政使。至太僕寺卿，引疾歸。卒，詔賜祭葬，贈都察院右副都御史。謚康僖。銳質任自然，不為矯飾，而言動必依於禮。一時稱為端士。故官不過三品。

而卹典特厚云

張岳

張岳福建惠安人正德丁丑進士授行人率同官諫毅
皇帝南巡杖闕下調南京國子監學正上登極復行人
歷司副至禮部主客司郎中出為廣西提學僉事已改
江西坐前所貢士黜落多謫廣東提舉知廉州遷浙江
督學副司右僉都御史撫治鄖陽改江西進右副都御
史總督兩廣軍務討封川文德大猾胸諸巢平之進兵

部右侍郎明年平陽懷遠諸獍進攻馬鞍魚窩平之召
改刑部為御史奏留不果行又明年平連獍尋進右都
御史時鎮銅仁諸苗叛亂朝議請遣大臣一人總視湖
廣川貴師詔以岳往岳謀度苗情謂前時主撫守皆非
計乃大集土漢兵檄諸將分道進勦斬獲以數千計會
有思川之敗詔奪一官未幾惡首盡殄首惡龍許保等
前後成擒三方底定功未上而岳卒其後兵部覈其功
復右都御史贈太子少保諡襄惠賜祭葬如例

唐禎

唐禎字元善直隸華亭人生而穎敏性復淳厚鄉先生見者皆器之家故饒裕而能自刻勵讀書百里外止以一僕自隨清苦如寒士不數年而學成領成化癸卯鄉薦丁未擢進士弘治初修憲宗實錄分遣進士詣四方採摭時事以禎往浙江禎悉心搜訪其所纂輯視他省獨精詳諸公稱之時二親並恙禎切于晨夕即以疾謁告歸承顏視膳雍容膝下者踰三年而母卒執喪哀毀

見者動容服終有勸之仕者以父老辭曰吾懼養之弗及也居歲餘父強遣之入都始授車駕之命明年以父喪歸辛酉改禮部儀制司主事乙酉陞主客員外郎進署精膳郎中事丁卯卒於官禎為人坦易色笑可親而中有矩度發皆中理儀曹重事在貢舉禎兩提調視範周密人言不興哈密貢數倍常而物皆濫惡禎在主客曰是虛名而糜我實賜也且以折估聞使者來懇譁于庭不去禎使譯諭之曰爾欺爾主易爾貢以為利不爾

罪足矣而又敢譁耶不聽且移文邊關詰爾主爾罪安
歸使者情得乃屈服精膳主天下貢茶至者必先呈樣
樣者其名實則以為私積所從來久矣禎至飭門者正
供外無得入流風一清人以此重之

潘璜

潘璜直隸婺源人舉進士由知縣擢戶部主事尋改禮
部與修明倫大典復改吏部擢禮部郎中歷福建提學
副使累遷吏部左侍郎戶部尚書調南京工部尋改南

京兵部致仕卒璜有文學行誼修飭士論重之

孫迪

孫迪字仲約浙江錢塘人迪生而秀穎志趨異凡子弟讀書過目輒記不忘稍長入邑庠授春秋語止侃侃出一時流輩上逾數年迪益自刻勵問學期大樹立又六年成進士選任翰林庶吉士不數月用薦者超擢禮部精膳員外郎奉命督運淮安既至遂病不起年始二十有七迪嘗讀書觀古今治亂遇豪傑功業之士必慷慨

拊髀恨不生其時躬上下論議至齟齬者不啻吐涕斤
不一顧視故其臨政施事一以理自許而惜年不永未
竟其志云

錢萱

錢萱浙江海鹽人少敏慧嘉靖七年由國子生中順天
府鄉試乙未舉進士為刑部湖廣司主事以母喪歸畢
改禮部祠祭司是時上方崇制作稽古秩祀諸所請覈
牘委積案而萱則與其長貳旁討廣證去取隆殺咸合

館延進諸生為指示經法為文章躬行於是皆輯不為
非在奉新十月而徙丹陽丹陽又道衝兩都舟車至者
日數十百日出河滸造請諸大夫賢者磬折為禮視供
具徒隸一一指授無失賓客意久之歸縣中為民均賦
平爭訟調繇作不暇給矣又時時進學宮諸生講說經
訓勸行如奉新時遂以治行高等入為兵部職方主事
調禮部精膳以疾乞歸尋卒年僅三十有六

劉元卿

劉元卿字調父江西安福人自幼雄奇穎敏時有以正學倡諸里者聞之喜動于心陳諸宋儒語錄堆案盈几玩而三思焉適郡太守公辨諸士試元卿盡以所學發于論太守大奇以為真儒再出入闈遂魁江西仍以學自砥礪卒未業入穀主司以其策多憤激語置之殿江陵聞而大怒下禮部以飭多士乃歸而倡學里中里中勃然興起甲戌不第扶其引杜門不出矣而從遊者日衆初復禮識仁中道一德諸院咸有常會西鄉諸習俗

得之一變既而以薦起為國子博士尋晉禮部主事元卿已絕意仕進強應聘出埋光剡采冀與各賢一移世軸覩時不可為遂飄然還里在國子薰德者甚衆在儀部疏從祀諸先大儒釐正女直儀皆其鉅者惜乎其大有為之才而未竟其用也元卿性敏又諳于典故有可補閭閻者聞必行行必力所著書甚富皆行于世

陳九川

陳九川字惟濬直隸寧國人癸酉舉鄉試甲戌登進士

第請告歸起授太常博士乙卯武宗將南巡衆莫諫獨
與舒國裳夏良勝萬潮連疏諫止有旨荷校跪午門外
五日杖五十除名直聲動朝野而病日甚然南巡竟止
識者壯之辛巳世宗即位拔諸諫臣仍補太常癸未進
禮部儀制員外郎冊封弋陽王乙酉轉主客郎中正貢
獻名物節犒賞費且數萬羣小懷銜會是時有他甘心
者思藉為媒嗾通事假夷語奏之下詔獄數瀕死不變
言官論救不聽丙戌戍鎮海衛己丑郊祀覃恩解還後

兩遇詔得閒住致仕九川凡再履機危而卒不肯濡滯
依違以為身家之謀而易其計蓋性成然也

李逢陽

李逢陽字惟明國初籍金吾後衛居南京幼端謹如成
人家庭間顰笑不苟雖盛暑恒整衣冠危坐終日無傾
側容視世沒溺財利惟恐污之戊午舉於鄉隆慶戊辰
第進士時方選庶吉士逢陽本第七人當道雅屬意逢
陽固辭弗就乃授戶部主事改儀部郎中會選宮人惟

簡其貌類端淑者艷冶悉置不與奉命遣祭楚王事竣以百金為贐卻之歸未幾友人楊希淳病逢陽親視湯藥或謂宜少避者不從楊卒未浹旬亦竟不起逢陽篤於踐履不事空談其沒也人咸惋惜之

王洪

王洪字希範浙江錢塘人生八歲即知務學及冠入郡庠從訓導胡粹中授春秋日記數千言無遺忘下筆為文辭沛然有奇氣率所事所言若老成人粹中大器之

年十八舉進士任行人將命關陝得使職人賢之未幾陞吏科給事中遂為檢討修大典為副總裁考滿陞修撰又陞侍講三以大比典文衡取士甚公職侍講踰三年遷禮部主事適尚書呂公巡行關陝凡部事悉命洪敷奏論事詳明同列敬服朝廷方屬意洪永樂十八年竟疾以卒年四十有二其疾也得賜藥物其卒也又得賜棺且給舟載歸恩惠隆至人莫及云

吳覲

吳覲字相虞直隸崑山人自幼秀朗異常兒稍長里胥責役即詣縣令自陳家有老母實不能遠離性竊有志於學幸矜念耳令異其言問論語書數條嚮答無滯立遣就邑庠生弟子員越二年以能書赴京預修永樂大典書成取賞而還歲戊戌膺貢入太學又明年中順天府鄉試宣德五年授刑部廣東司主事逾年改行在雲南司兩司皆兼理京府號繁劇覲皆優為之日收善譽正統丙辰乞歸省祭還朝改禮部主客司賢譽不減刑

部時以母高年且無他子弟力乞歸養大宗伯吳公留之至再不可得既歸孝養備至母卒喪葬盡禮優游林下者四十年始卒年八十有五

仵瑜


仵瑜字忠父湖廣蒲圻人生而忱恂篤厚溫惇身若不勝衣言悛悛若不出諸口孝友之行本諸天性弱植操修夙夜匪懈正德庚午發解廣省丁丑成進士已卯授禮部主客司主事大宗伯稱賞乃毛公獨至未幾上疏

病歸新天子出離御宸號召黎老登庸宅俊光昭大烈
赫赫濯濯與天下更始迺復如京師上疏論天下事一
曰勤學二曰篤親親三曰開言路四曰敬大臣五曰選
諍臣六曰去浮屠七曰拯困窮八曰重守令九曰修武
備十曰儲人才疏上上嘉納之下諸司條行迺仍厥官
提督四夷館甲申春上召輔臣于平臺于煖閣諭以尊
稱之典大學士楊廷和蔣冕毛紀力諫以為干正統違
大議上瀆九廟內間兩宮未敢輕議上意不豫者久之

乃主事桂萼窺伺風旨竊取席書張璁霍韜方獻夫諸議奏之上下其議在廷諸臣堅執以為不可時廷和去冕即繼去禮部尚書汪俊又去乃以書為禮部尚書萼璁獻夫為學士諸臣羞與為伍遂不謀而同抗言力辨或謫或罷或繫獄無虛日秋七月乙亥上降手敕改稱孝宗敬皇帝為皇伯考恭穆獻皇帝為皇考昭聖皇太后為皇伯母章聖皇太后為聖母諸司俱奏以為不可十月五日戊寅少宰氏何孟春率百官伏闕死爭大學

士毛紀石琚取帖伏于前時近年上命司禮監宣諭乃
下學士豐熙給事中張紳御史俞翺郎中余寬黃待顯
陶滋相世芳寺正母德純于獄百官號泣聲震闕廷瑜
嘆曰吾禮官也有死而已已而未末申初有駕危言以
嫁禍中傷者上復命內使宣諭時大臣已退惟諸司在
上大震怒悉下百官于錦衣衛獄庚辰械至午門前杖
三十死者十有六人編修王恩王相給事中張原毛玉
裴紹宗御史胡瓊員外郎張燦主事臧應奎安璽楊

余禎胡璉殷承叙司務李可登而瑜亦竟不起矣時伏
闕後十日也享年四十有八



禮部志稿卷五十八